

**Date – 23/05/2026**

**Time - 7:30 -7:40 Hrs**

**AKASHVANI AIZAWL**  
**REGIONAL NEWS BULLETIN**  
**HEADLINES (MORNING)**

1. PWD Minister Pu Vanlalhlana'n Mizoram leh Tripura state inkalpawhna mumal tak a awm chu lawmawm atih thu sawiin thenawm state nena inpawhna tha zawk a siam ngei a beisei thu a sawi.
2. Mizoram Sorkar chuan OSD to Chief Minister Pi Lalrodingi chu a hna pangai bakah Tourism Director hna chelh turin a ruat.
3. India leh Cyprus te chuan firfiakte do tur sipai intawm siam an remti.
4. Sawrkar laipui chuan Bangladesh leh Pakistan ramri-ah Smart Border Project kalpui a ramri phui zawka siam a ni dawn.

<><><>

**TEIREI BRIDGE**

PWD Minister Pu Vanlalhlana'n Mizoram leh Tripura state inkalpawhna mumal tak a awm chu lawmawm atih thu sawiin thenawm state nena inpawhna tha zawk a siam ngei a beisei thu a sawi.

Nimin khan PWD Minister hian Mizoram leh Tripura state inkalpawhna kawnga Langkaih lei dawh thar leh Bairabi leh Zamuang inkara Teirei Lei dawh thar a hawng a, Kanhmun khua a Langkaih lui Double lane PSC Girder Bridge hi cheng nuai sang 2 za 2 leh 3 (₹ 2203.26 lakhs) senga siam niin Pu Vanlalhlana cuhan Mizoram leh Tripura inkalpawhna kawng pawimawh tak hawn chuan state 2 inlaichinna tha zawk a siam ngei a beisei thu a sawi a, insumdawn tawna kawngah pawh hmasawna tha zawka thlen a beisei thu a sawi.

Minister hian nimin vek khan Bairabi leh Zamuang inkara Teirei Lei dawh thar a hawng a, Teirei lei hi meter 102 a thui a ni a, NABARD loan cheng vbch. 13, nuai 65 leh sing 6 hmangin kum 2017 khan dawh tan a ni a, sum hian a daih loh avangin SASCI 2023-24 sum cheng vbch. 14 hmanga thawh chhunzawm a ni a, Double Lane Build-up Steel Girder Bridge (BUSG) hmanga siam a ni.

<><><>

## **EDUCATION MINISTER**

Education Minister Dr Vanlalhlalan Mizoram sorkarin Sorkar School Provincialise a a hlankai tharte chu kum 2023 notification hmanga 'Criteria' phakte an ni tih a sawi.

Nimin khan Aizawl Press Club-ah thuthar thehdarh tute kawmin Education Minister chuan, tunhnaia Council of Ministers thukhawm chuan School 51 chu Sorkar School ni turin a pawm, an zingah hian School pakhat Special Blind School, Durtlang ami chiah chu criteria phak lo a ni tih sawiin, anni hi chu vohbik enkawlna hmun niin khawngaihna leh ngaihnathiamna nen en an ni tih a sawi a ni.

Education Minister chuan an lak theihna dan ah hian 'Power to Relax' clause hman a ni tih sawiin, kum 2023-a enrollment criteria pha lo pawh kum 4 chhunga enrollment chawh rual -2025 enrollment leh 2026 enrollment atanga criteria an rawn phak chhoh chuan provincialised tur zingah telh an ni a ti.

Dr Vanlalhlana chuan Higher Secondary School zingah Ngopa HSS-in criteria 80% pass percentage leh enrollement 80/40 pha lovin pass percentage-a a phak lohna zawk hi ngaihdam a ni a, heti hian provincialisation atana Council of Ministers meeting-in a chhawp chhuah tak chu school 51 an ni ta tih sawiin, kum 2023 criteria pha si, kum 2026-a an enrollment tla hniam nasa ta lutukte chu school-ah kal chilhin, a hmunah en dik nghal an ni ang, a ti.

Education Minister chuan, tuna Adhoc School ni mek, provincialise theih tak lohte chu Special Category 1 School-ah dah an ni ang a ti a. Tuna Adhoc School-a thawk mekte hian zirtirtu nghet regular teacher ang chiahin 'Full Basic Pay leh Full Allowance' an la tawh ang a ti bawk.

<><><>

## **TOURISM DIRECTOR**

Mizoram Sorkar chuan OSD to Chief Minister Pi Lalrodingi chu a hna pangai bakah Tourism Director hna chelh turin a ruat.

General Administration Department chuan nimin khan Office Order tichhuakin tunhnaia Sorkar hna atanga a Pension hnua Sorkar-in Officer on Special Duty to the Chief Minister atana a ruat Pi Lalrodingi chu a hna pangngai bakah Tourism Director hna chelh tura ruat a nih thu hriattirna a tichhuak.

Tarlan tawh angin Pi Lalrodingi hi Sorkar hna atanga a pension hnua Mizoram Sorkar chuan rawih nawna Order a tichhuak a. Hei hi Mizo Zirlai Pawl in na taka an dodal hnua Sorkar-in Officer on Special Duty to the Chief Minister ah chiah dah a ni a, nimin khan a hna chanpual bakah Tourism Director hna hi pek belh a ni.

<><><>

## SUPPLY MINISTER PRESS CONF

Food Civil Supplies & Consumer Affairs Minister Pu B Lalchanzovan tunhnaia Lunglei Dist. Truck Driver Association ten FCI a an bukna leh PDS a bukna in ang lo chu chinfel a ni tawh a ti.

Minister hian Lunglei tlawhin, Retailer te hlawh pawh tihsan chu a tul tih sawiin Card Var leh sen ah Kg-ah Rs 1.80 an hlawh thin chu reiloteah Rs 2 a tihsan a ni dawn a, Card eng leh pawl ah Kg a Rs 2.85 an hlawh thin pawh Rs 3 ah tihsan a ni dawn a, Carrying Bill pawh tihsan a ni ang a ti.

Mipui ten eirawngbawlina Gas leh buhfai buk diktaka an lei theih nan a hmalak chu a ngaih pawimawh a ni tih a sawi a, Oil chungchangah pawh mipui tan theihtawp a hmalak a ni a, West Asia a buaina avanga inventhawn thilah ruahmanna te siam a ni a, hetihlai hian nitin trip 40/50 vel chu a lo thleng reng a ni a ti.

Printing & Stationery Changtu Minister, Pu B Lalchhanvzova hian tukin khan Lunglei Circuit House-ah MJA te a kawm a, MJA te nen tha taka thawhho a duh tih sawiin Sorkar in ruahmanna hrang hrang a siam te mipui hmaah a tam thei ang ber a puanzar hmasak a, ruahmanna a chinchhuak a an hriat ve zel a duh tih a sawi.

Tuntum Lunglei a tlawh hian Printing & Stationery ram leh Bar Association ten an dil angin Court Building sakna tur Rahsiveng ami leh tun a DC Office Complex-a an awmna chu P&S nen ram inthleng tur a rawtna a rawn en tih a sawi a, Judiciary tih chak chu ram hmasawwna tur anih avangin tun a hmun chep lutuk a an awm loh nan hmalak a ngai dawn a ni a ti a, hetihrial hian Minister hian Printing & Stationery chu tih chak tum a ni tih a sawi.

<><><>

## IOCL

Indian Oil Corporation Limited (IOCL) chuan ram pumah tuialhthei indaih lohna a awm loh thu leh tluang taka pek chhuah chhunzawm zel a ni tih a tarlang.

IOCL chuan social media kaltlangin, petrol pump-ah te lei theih zat bithliah tura thupek eng mah chhuah a ni lo tih a tarlang a. Tun hnaia mamawhna a san chhan chu thlai seng hun lai a nih avanga diesel hman nasat avang te leh, private company dangte aia an tlawm zawk avanga dawrtu an ngah zual vang a ni a ti. Indian Oil chuan indaih loh hlauhthawn avanga lei khawl ching lo turin mipuite a ngen a. Thuthang dik lo laka fimkhur tur leh sawrkar thuchhuah rintlak chauh rinchan turin a ngen bawh a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## RS ELECTION

Mizoram telin ramchhung State 10-a Rajya sabha seat 24 atan June ni 18 ah vote thlak a nih tur thu Election Commission chuan nimin khan a puang.

Hemi chungchanga Election Commission in hriattirna a tihchhuah ah inthlan hriattirna hi June ni 1 ah tihchhuah tur a ni a, June ni 18 ah vote thlak tur a ni a, hemi ni vek hian vote chhiar nghal tur a ni dawn a ni.

Rajya Sabha member thlanna hi Mizoram, Andhra Pradesh, Gujarat, Karnataka, Rajasthan, Madhya Pradesh, Jharkhand, Manipur, Meghalaya leh Arunachal Pradesh ah te neih tur a ni dawn a, Rajya Sabha member kalchhuaktur zingah hian Prime Minister hlui H. D. Devegowda, Union Minister George Kurian leh Ravneet Singh a te an tel a, Mizoram ah chuan Pu K Vanlalvena'n a term a zo chiah dawn a ni.

Vote thlak hun atana ruat June ni 18-ah zinga dar 9 atanga tlai dar 4 thleng vote thlak theih hun hawn a ni dawn a. Vote thlate chu tlai dar 5 atanga vote hi chhiar nghal tur a ni.

<><><>

## INDIA-CYPRUS

India leh Cyprus te chuan firfiakte do tur sipai intawm siam an remti. Nimin khan Prime Minister Narendra Modia leh Cyprus President Nikos Christodoulides te New Delhi-a an inbiaknaah he inremna hi siam a ni a. Ram pahnih thawhdunna chu Strategic Partnership-a hlankai an remti bawk a. Hruaitu pahnihte hian firfiaka chetna hrang hrang chu do zel an tum thu an sawi a. Joint Working Group on Counter Terrorism din tura inremna an siam bakah hain Sushma Swaraj Institute of Foreign Service leh Diplomatic Academy of Cyprus te thawhdunna tur MoU ziah a ni bawk a ni.

Chanchinbumite hmaah Cyprus President nen an inbiakna chungchang sawiin Prime Minister Narendra Modia chuan India leh Cyprus te chuan Indo-Pacific Ocean Initiative leh India-Middle East-Europe Economic Corridor hmanga inkalpawhna tihchangtlunnaah thawhdun an rem an ti a. Cyber Security, maritime security leh counter-terrorism lamah thawhdun an remti a ti bawk a ni.

<><><>

## SMART BORDER PROJECT

Sawrkar laipui chuan Bangladesh leh Pakistan ramri-ah Smart Border Project kalpui a ramri phui zawka siam a ni dawn. Union Home Minister Amit Shah-a chuan nimina New Delhi-a Border Security Force Investiture Ceremony and Rustamji Memorial Lecture ah he thu hi sawiin ramri hun pin a, luhruk theih loha siam turin hnathawh mek a ni a ti a. Smart Border Concept hmang hian tunlai thiamna changkang tak takte hmangin rami him zawka venhim a ni ang a ti a. He project ah hian drone, radar, canmera changkang leh khawl thil changkang tak tak hman a ni ang a ti a. Border Security Force te hnathawh pawh a ti awlsam dawn a ti bawk.

